

Minister di Finanzas sr. Nilo Swaen

Lei di BBO a pasa unanimamente den Parlamento y ta un lei totalmente legal

ORANJESTAD — E lei di BBO ta un lei cu ta pasa den tur e rekisitonan legal y conta cu aprobacion unanime den Parlamento, pues ta un lei totalmente legal, segun minister di Finanzas sr. Nilo Swaen.

Parlamentariosr. Rudy Lampe ta un persona cu den pasado minister Swaen tabatin hopi aprecio pe, sinembargo bo ta mira cu continuamente desde cu e la drenta politica mas y mas ora bo ta yega cerca di eleccion, e no por domina su mania manipulativo cu e tin como persona, segun e mandatario.

Den Parlamento Minister Swaen a yega di bisa sr. Lampe cu si esaki ta e rumbo

cu e la scohe pa hiba politica, cu por medio di manipulacion di un comunidad, yega na poder, si bo yega mes e lo ta di corto duracion.

Minister Swaen ta contento cu hopi hende a cuminsa mira e personalidad einan y e forma di hiba politica di parti di sr. Rudy Lampe. Un persona bon prepara, pero un persona cu ta scohe manipulacion pa yega na poder y esaki no ta un caminda pa yega.

BBO cu informacion como gobierno cu nan ta haya for di parlamento a cu e lei a wordo discuti den parlamento y el

a pasa unanimamente y cu informacion cu sr. Swaen a haya, ta muestra cu Lampe ta manipula cu firmanan, cu nota e firmanan real of firmanan di prome instancia caminda cu e reunion einan a wordo yama.

Tabatin dos punto di agenda e dia ei y na comienso di e reunion einan tur hende a firma, incluso esnan di oposicion y ta e mesun firmanan ei ta conta tambe.

E agenda einan na momento di votacion e la pasa unanimamente paso oposicion a bandona sala d parlamento y como gobierno na a ricibi tambe for di parlamento e lei aki y despues firma pa gobernador

di Aruba cu e lei di BBO ta un lei autentico cu Parlamento a pasa y cu e tin e poder di lei y ta implementando esaki caba pa tres aña.

Si enberdad persona kier cuminsa caso, ta bon pa nan bisa sr. Rudy Lampe pa e paga abogado pa nan.

Pasobra si Lampe ta asina sigur y cu e no ta manipulando y e ta hincando hendenan den debe cu e sa di antemano cu nan no tin pia pa para ariba, e hendenan mester bolbe cerca sr. Rudy Lampe y cubri e gastonan cu e hendenan a hinca nan culpa aden, debi na e situacion aki.

Minister sr. Swaen ta haya simplemente un manipulacion di parti Lampe

y e ta kere cu na e nivel aki e nota haya cu Lampe mester bai den manipulacion aki cu pueblo.

E lei aki a pasa unanimamente den parlamento.

Di informacion cu Minister Swaen ricibi di parlamento ta cu e ta hungando cu un papel di firma, cu na momento cu e prome papel di firma cu tur hende a firma riba dje no tabata presente a bin cu un alternativa, pero e prome papel cu tur hende a firma a aparece y e ta den parlamento y e lei aki a keda pasa unanimamente, kiemen no tin nada di ilegalidad ta tumando luga akinan cu e lei di BBO.

Segun Banco Central Aruba

Cantidad di placa den circulacion ta crece, entrada di BBO ta baha y inflacion ta mengua

ORANJESTAD - Na December 2008, e cantidad di placa den circulacion a crece cu Afl. 100.8 miyon of 3.5 por ciento te na Afl. 2,990.5 miyon, causa pa un subida di Afl. 171.9 miyon den fluho neto di fondo for di exterior y un contracion di Afl. 71.1 miyon (3.8 por ciento) den e activo domestico neto.

Consecuentemente, e reserva di divisa (excluyendo diferencianan den revaluacion di oro y reservanan internacional) a subi te na Afl. 1,196.6 miyon na final di December 2008, cual ta Afl. 480 miyon of 67 por ciento mas halto cu e suma registra den e luna corespondiente di 2007. E componente di exterior a contribui mas tanto na e subida di Afl. 424.1 miyon (16.5 por ciento) den e cantidad di placa den circulacion pa e aña 2008.

ECONOMIA

E economia di Aruba a sigi duna señalnan di ta debilitando, particularmente durante e ultimo mita di aña 2008.

Den December 2008 y pa prome biaha desde su introduccion na Januari 2007, ambos entrada nominal y real di impuesto riba benta di negoshi (BBO) tabata, respectivamente, 2.9 por ciento y 3 por ciento mas abou compara cu e mesun luna na aña 2007. Tambe tin indicacionan cu e crecimiento den gastonan pa consumo a baha, manera indica dor di e crecimiento di credito na consumidorman menos rapido durante e aña te cu awor.

TURISMO

E yegada di turistanan na aeropuerto ta muestra cu e crecimiento durante e di dos mita di 2008 a decelera te na 0.7 por ciento (compara cu e periode corespondiente di 2007), contra un

subida di 19.2 por ciento durante e prome mita di aña 2008.

Di otro banda pa aña 2008, e cifranan di Aruba Tourism Authority riba cantidad di turistanan (Januari 2008 - Juni 2008) hunto cu e cifranan di yegada di turistanan na aeropuerto pa e lunanan di Juli 2008 te cu December 2008, ta muestra un subida di 8.2 por ciento riba e cantidad di turistanan.

Datonan for di Cruise Tourism Authority ta indica cu ambos e cantidad di turistanan crucero y e cantidad di barconan a subi cu, respectivamente, 15.4 por ciento y 13.3 por ciento na December 2008, compara cu e luna corespondiente di 2007.

INFLACION

Mientras cu inflacion na November 2008 tabata mita di esun di e mesun luna na 2007, e cifra pa December ta

muestra un deflacion (-1.0 por ciento) pa prome biaha desde cu datonan di prijsnan a wordo colecta. No obstante, e promedio anual di e tasa di inflacion a yega te na 8 por ciento na aña 2008, compara cu 6 por ciento na December 2007.

E cambio reciente di e tasa anual di inflacion tambe a influencia e diferencia cu e inflacion di Merca, e partner comercial principal di Aruba.

Na December 2008 e diferencia a disminui te na 4.2 punto di porcentahe, compara cu 4.8 punto di porcentahe den e luna anterior. Ora cu exclui e componentenan relata na energia (awa, coriente y gasolin), e promedio anual di e tasa di inflacion a subi cu 0.1 punto di porcentahe te na 5.1 por ciento na December 2008, compara cu e periodo corespondiente un aña anterior.